

Conferma da la via actuala – taglia pauschala resta

Il pievel vul salvar la taglia pauschala

■ **(anr/vi) Il pievel vul salvar la taglia pauschala che vala per esters ritgs che abiteschan en Svizra e na lavuran betg qua. Ier è l'iniziativa cunter la taglia pauschala vegnida refusada.** Il resultat cler muntia ina conferma da la directziun tschernida, ha ditg *Peter Hegglin*, president dals directurs da finanzas. I saja in grond levgiament ch'il suveran sustegna la politica actuala.

La raschun per il «na» vesa Hegglin en il fatg ch'il parlament haja decidì premissas pli severas per la taglia pauschala. Il directur da finanzas da Zug spera ch'ins possa uss metter ad acta per intgins onns la taglia pauschala. El è er optimistic che

l'iniziativa davart la taglia d'ierta vegnia refusada e che la refurma da taglia per interpresas III gartegia.

Ils iniziants èn trumpads, ma els fan era attent che l'iniziativa haja tuttina gè effect: A partir dal 2016 van en vigur las premissas pli severas per la taglia pauschala.

La suveranità da taglia ed il federalissem hajan probabel dà il stausch per la refusa, ha ditg cusseglier naziunal *Andy Tschümperlin* da la ps. Sia partida na dettia dentant betg si. Ins veglia batter vinavant per dapli giustia da taglia. «Dagut e dagut fan puz», ha ditg Tschümperlin.